

## RELEVANSI TEORI MAQASID AL-SYARIAH SEBAGAI LANDASAN PEMBANGUNAN MODEL KEPEMIMPINAN NEGARA MALAYSIA BAGI WANITA

Atriza binti Umar  
Open University Malaysia (OUM)  
Tel: +6016-2325637 Email: [atriza\\_umar@gmail.com](mailto:atriza_umar@gmail.com)

Hamidah binti Mat  
Open University Malaysia (OUM)  
Tel: +6017-2360438 E-maiil: [hamidah\\_mat@oum.edu.my](mailto:hamidah_mat@oum.edu.my)

### ABSTRAK

Tahap keterlibatan Wanita dalam kepimpinan tertinggi negara Malaysia masih berada di tahap yang rendah. Pelbagai usaha dari pelbagai pihak dijalankan demi meningkatkan pemberdayaan Wanita menerusi ruang kepimpinan negara. Kajian ini bertujuan mengkaji relevansi teori Maqasid al-Syariah sebagai landasan pembangunan Model Kepemimpinan Negara Malaysia bagi Wanita. Teori Maqasid al-Syariah yang merumuskan objektif-objektif pensyariaan hukum syarak menawarkan prinsip-prinsip yang relevan untuk membentuk model kepimpinan yang inklusif. Kajian kualitatif ini menggunakan kaedah temubual mendalam dengan pakar-pakar dalam bidang syariah dan kepimpinan. Hipotesis kajian ini mengandaikan bahawa implementasi model kepimpinan yang inklusif, sejajar dengan prinsip-prinsip Maqasid al-Syariah, akan menghasilkan kesejahteraan sosial yang lebih besar dan mempromosikan kesetaraan gender dalam kepimpinan negara. Kesimpulan dari kajian ini dijangka dapat memberikan pandangan yang berharga kepada pembuat dasar, pemimpin politik, dan pihak berkepentingan lain dalam usaha mereka untuk mencapai kesetaraan gender dan keadilan sosial dalam kepimpinan negara.

**Kata kunci:** Kepimpinan wanita, Maqasid al-syariah, model kepimpinan

### 1. Pengenalan

Keterlibatan wanita dalam kepimpinan tertinggi negara Malaysia masih menghadapi cabaran yang ketara. Walaupun pelbagai usaha telah dilakukan untuk meningkatkan pemberdayaan wanita dalam ruang kepimpinan negara, namun tahap pencapaian masih dianggap rendah. Dalam konteks ini, teori Maqasid al-Syariah muncul sebagai satu landasan yang relevan bagi pembangunan Model Kepemimpinan Negara Malaysia khususnya bagi wanita. Teori ini, yang merangkumi objektif-objektif pensyariaan hukum syarak, menawarkan prinsip-prinsip yang dapat membentuk model kepimpinan yang inklusif.

Kajian ini bertujuan untuk membincangkan relevansi teori Maqasid al-Syariah dalam konteks pembangunan Model Kepemimpinan Negara Malaysia bagi wanita. Kajian kualitatif ini menggunakan kaedah temubual mendalam dengan pakar-pakar dalam bidang syariah dan kepimpinan. Hipotesis kajian ini mengandaikan bahawa implementasi model kepimpinan yang inklusif, yang sejajar dengan prinsip-prinsip Maqasid al-Syariah, akan menghasilkan kesejahteraan sosial yang lebih besar dan mempromosikan kesetaraan gender dalam kepimpinan negara.

Masalah kajian ini adalah tahap keterlibatan wanita dalam kepimpinan tertinggi negara Malaysia yang masih rendah. Walaupun terdapat pelbagai usaha untuk meningkatkan pemberdayaan wanita dalam ruang kepimpinan negara, namun pencapaian masih dianggap rendah. Oleh itu, terdapat keperluan untuk mengkaji relevansi teori Maqasid al-Syariah sebagai landasan pembangunan Model Kepemimpinan Negara Malaysia bagi wanita, serta bagaimana implementasi model kepimpinan yang inklusif, berdasarkan prinsip-prinsip Maqasid al-Syariah, dapat menghasilkan kesejahteraan sosial yang lebih besar dan mempromosikan kesetaraan gender dalam kepimpinan negara.

## 2. Metodologi kajian

Kajian ini adalah kajian kualitatif yang menggunakan kaedah temubual mendalam dengan pakar-pakar dalam bidang syariah dan kepimpinan. Kaedah ini dipilih kerana ia membolehkan penyelidik mendapatkan pemahaman yang mendalam tentang pandangan dan pendapat para pakar mengenai relevansi teori Maqasid al-Syariah dalam konteks pembangunan Model Kepemimpinan Negara Malaysia bagi wanita. Kajian ini juga meneroka literasi silam dan kontemporari berkaitan kepimpinan Wanita dalam konteks kepimpinan negara. Kajian-kajian lepas turut dirujuk demi memastikan kesinambungan dan penghargaan keilmuan yang wajar.

## 3. Sorotan Literatur

Al-Mawardi menyatakan dalam al-Ahkam al-Sultaniyah bahawa matlamat pemerintahan dan pentadbiran negara adalah *siyasat al-dunya wa ad-din*, iaitu menguruskan segala perkara untuk mencapai kebaikan di dunia dan di akhirat. Kebaikan-kebaikan ini terkandung dalam gagasan maqasid al-syariah yang mendefinisikan kebaikan di dunia dan akhirat merangkumi penjagaan terhadap kepentingan agama, nyawa, akal, keturunan dan harta bagi manusia di dunia mahupun akhirat (Abdul Rahman, 2015).

Menurut Nor, A. H. M., & Laluddin, H. (2012), objektif syariah tersebut apabila dilihat di dalam urusan kepimpinan dan pentadbiran pula adalah berkaitan secara langsung dengan kepentingan awam yang berasaskan kepada kaedah fiqh '*Tasarruf al-imam 'ala al-ra'iyah manut bi al-maslahah*'. Oleh itu, perkara pertama yang perlu ada untuk memastikan sesebuah negara itu dapat ditadbir dengan baik berlandaskan maqasid syariah adalah keperluannya kepada seorang pemimpin.

Kerelevanan teori Maqasid al-Syariah sebagai asas untuk membangunkan model kepimpinan negara bagi wanita di Malaysia merupakan topik yang mendapat perhatian yang besar dalam beberapa tahun terakhir. Maqasid al-Syariah menyediakan kerangka yang komprehensif untuk memahami matlamat dan prinsip-prinsip perundangan Islam. Dalam konteks kepimpinan dan pentadbiran, Maqasid al-Syariah menawarkan pandangan yang wajar mengenai dimensi etika dan moral kepimpinan, yang sesuai dengan latar belakang sosio budaya Malaysia.

Beberapa sarjana telah meneroka aplikasi Maqasid al-Syariah dalam model pentadbiran dan kepimpinan kontemporari, dengan menekankan potensinya untuk menangani cabaran-cabaran semasa sambil tetap berakar dalam prinsip-prinsip Islam sebagaimana yang diperincikan dalam siasah al-syar'iyah.

Bagi memastikan sesuatu kepimpinan negara menepati Maqasid Al-Syariah, maka penerapan *siyāsah syar'iyah* perlu menjurus terhadap pemeliharaan *Maqasid Al-Syariah*. Sebagai contoh, Meerangani, K. A., Harun, M. S., & Badhrulhisham, A. (2021) mencadangkan beberapa langkah demi mencapai hasrat tersebut iaitu pentadbiran berasaskan *siyāsah syar'iyah* mestilah menjaga prinsip berikut:

- Menepati *Maqasid Al-Syariah* terdiri daripada prinsip-prinsip dan asasnya samada *al-darūriyyāt*, *al-hājiyyāt* dan *al-tahsīniyyāt*
- Menjadikan *Maqasid Al-Syariah* sebagai ukuran dan rujukan dalam persoalan dan masalah baru berkait urusan umat
- Menentukan hukum baru berdasarkan kaedah *maṣāliḥ mursalah* dan *Maqasid Al-Syariah*
- Merealisasikan *maqṣad al-takāful* antara anggota masyarakat dan keadilan masyarakat.

Justeru, perlunya kejituan antara *siyāsah syar'iyah* dan *Maqasid Al-Syariah*. Oleh kerana itu, golongan yang terlibat dengan hal ewhal pemerintahan perlu menjadikan *Maqasid Al-Syariah* sebagai dasar-dasar pentadbirannya

Dalam konteks khusus kepemimpinan wanita di Malaysia, adalah menjadi satu keperluan untuk mewujudkan model kepemimpinan yang merangkumi nilai-nilai dan etika Islam dalam rangka memberdayakan wanita untuk mengambil peranan kepemimpinan negara. Mengintegrasikan prinsip-prinsip *Maqasid al-Syariah* ke dalam inisiatif latihan dan pembangunan kepemimpinan, wanita boleh menyumbang secara efektif kepada usaha pembangunan negara.

Secara ringkasnya, sorotan literatur menunjukkan minat yang semakin meningkat dalam mengintegrasikan prinsip-prinsip *Maqasid al-Syariah* ke dalam usaha pembangunan kepemimpinan, terutamanya berkaitan dengan kepemimpinan wanita di Malaysia. Dengan mendasarkan model kepemimpinan dalam etika dan nilai-nilai Islam, pembuat dasar dan pihak berkepentingan dapat menggalakkan amalan kepemimpinan yang inklusif dan saksama yang mencerminkan kepelbagaian dan kekayaan warisan Islam Malaysia. Kajian lanjut diperlukan untuk meneroka implikasi praktikal penggunaan teori *Maqasid al-Syariah* dalam program pembangunan kepemimpinan dan dasar yang bertujuan untuk memajukan penyertaan wanita dalam pentadbiran dan proses membuat keputusan.

#### 4. Analisis dan Perbincangan

Sorotan literatur mendapati bahawa *Maqasid al-Syariah* adalah rangka kerja yang sesuai untuk dijadikan dasar model kepimpinan negara oleh wanita. Ini kerana *maqasid al-Syariah* memberi tumpuan kepada prinsip-prinsip kesejahteraan manusia secara keseluruhan, yang meliputi keadilan, kesejahteraan sosial, dan hak-hak individu.

*Maqasid al-Syariah* menekankan pentingnya keadilan dan kesaksamaan dalam semua aspek kehidupan, termasuk dalam kepimpinan. Ini bermaksud bahawa kepimpinan wanita dalam negara harus dipandang melalui lensa keadilan di mana wanita diberikan peluang yang sama untuk memimpin dan menyumbang kepada masyarakat. Keadilan ini termasuklah peluang yang adil dalam pendidikan, ekonomi, dan politik.

Sharifah Haayati (2024), berpandangan bahawa tadbir urus negara sedia ada kebanyakannya menepati prinsip *maqasid al-syariah*.

*“Jika kita lihat tadbir urus di negara kita telah banyak berasaskan maqasid Syariah. Jadi jika tadbir urus negara ini, kita lihat daripada sudut maqasidnya, makanya, Maqasid itu boleh digunapakai dalam apa jua spktrum kehidupan termasuklah ‘women and leadership’ ini. Sebab leadership itu perlu berlandaskan maqasid tersebut. Maqasid ini sebagaimana kita tahu, asasnya adalah masalah. Tiada masalah tiada maqasid dan tumpuannya kepada 3 perkara iaitu:*

- a) *Jalbul masalah ( جلب المصالح ) - bawa kebaikan*
- b) *Dar ul masfadah ( درء المفاسد ) – hindar keburukan*
- c) *Izalatul mudharah ( ازالة المضرة ) – membuang kemudharatan.”*

Pandangan beliau seiring dengan pandangan ulama silam dan kontemporari yang menegaskan bahawa ruang kepimpinan merupakan ruang yang luas terbuka kepada ijtihad demi menyantuni isu-isu baharu. Maka, ia bertepatan sekali dengan gagasan teori *maqasid al-syariah* yang mempromosikan

masalah dan mengelakkan kemudaratan dari manusia sejagat dalam apa jua keadaan (Maszlee Malik & Hamidah Mat, 2023).

Sementara itu, Rosfazila (2024) berpandangan:

*“Model kepemimpinan Wanita Tertinggi Negara perlu diwujudkan berdasarkan model-model yang sudah sedia ada dalam persejarahan, sirah nabawiyah, peradaban Islam terutamanya telah ada model-model kepemimpinan wanita yang boleh diteladani. Namun demikian, jika ada usaha untuk mewujudkan model kepemimpinan wanita di peringkat tertinggi negara, contohnya dalam konteks Malaysia, adalah sangat-sangat perlu dan digalakkan supaya kita ada model, idola, yang boleh dijadikan panduan. Untuk memastikan gaya kepemimpinan dan ‘end result’ aktiviti atau proses kepemimpinan yang wanita tunjukkan itu bermanfaat kepada dirinya, dan persekitaran komunitinya. Dalam konteks kepemimpinan tertinggi negara sangat menunjukkan keseimbangan antara gender lelaki dan perempuan, ada kelebihan masing-masing dalam arena kepemimpinan. Ada perkara-perkara yang kita memerlukan kepemimpinan lelaki dan begitujuga sebaliknya ada yang memerlukan kepemimpinan wanita, agar seimbang kerana kedua-dua gender ini adalah ahli masyarakat. Begitujuga dalam aspek kepemimpinan tertinggi, perlu ada sentuhan kepemimpinan wanita, supaya kita ada situasi yang seimbang dari segi kebahagiaan, kejayaan dan sebagainya.”* Justeru, pandangan beliau selari dengan literasi yang telah disorot dan menguatkan lagi kenyataan oleh Sharifah Hayaati (2024).

Selain itu, Maqasid al-Syariah menggariskan kepentingan pemeliharaan akal, yang mencakupi pendidikan dan perkembangan intelektual. Wanita, sebagai pemimpin, boleh memanfaatkan pendidikan dan pemikiran kritis untuk membuat keputusan yang bijaksana dan berwawasan bagi negara. Pendidikan yang inklusif dan akses kepada pengetahuan adalah asas kepada kepemimpinan yang efektif, dan ini selaras dengan objektif maqasid al-Syariah. Sehubungan itu, Rosfazila (2024), mengatakan *wanita secara fitrahnya, adalah dilahirkan sebagai pemimpin, paling tidak kepada dirinya sendiri, keluarga, individu-individu yang terdekat dengannya, masyarakat juga negara. Dalam konteks kepemimpinan tertinggi negara, wanita layak, berkeupayaan untuk memegang tampuk kepemimpinan tertinggi negara kerana keupayaan yang Allah berikan sebenarnya sama, rentas gender. Cuma haruslah berlandaskan kepada etika-etika kepemimpinan berdasarkan syarak.*

Prinsip maqasid al-Syariah juga menekankan pentingnya menggalakkan kebaikan dan mencegah keburukan dalam masyarakat. Wanita dalam kepemimpinan boleh memainkan peranan penting dalam mempromosikan nilai-nilai positif, seperti integriti, ketelusan, dan tanggungjawab sosial. Mereka juga boleh bekerja untuk menghapuskan korupsi, diskriminasi, dan ketidakadilan. Sharifah Haayati (2024), menyatakan kepemimpinan wanita di peringkat tertinggi negara, adalah seharusnya difikirkan kewujudannya bersesuaian dengan waqie (keadaan) semasa kerana dalam Islam hukum wanita dan kepemimpinan ini adalah aspek ijtihadi.

## 5. Kesimpulan

Maqasid al-Syariah menyediakan asas yang kukuh dan komprehensif untuk model kepemimpinan negara oleh wanita, kerana ia menekankan prinsip-prinsip keadilan, kesejahteraan, dan hak asasi manusia yang penting untuk pembangunan sebuah masyarakat yang adil dan sejahtera. Dengan mengintegrasikan prinsip-prinsip maqasid al-Syariah dalam kepemimpinan, wanita boleh membawa perspektif yang unik dan berharga dalam usaha membangun negara yang lebih inklusif dan progresif.

Justeru, teori Maqasid al-Syariah adalah relevan untuk dijadikan dasar bagi pembangunan Model Kepemimpinan Negara Malaysia bagi wanita kerana gagasan yang dibawa memperjuangkan

masalah bukan sahaja kepada rakyat dan negara, malah kepada wanita itu sendiri sebagai individu yang sudah sedia ada mempunyai peranan yang pelbagai dalam masyarakat.

## 6. Penghargaan

Artikel ini adalah sebahagian daripada kajian Ijazah Kedoktoran di Open University Malaysia (OUM)

## 7. Rujukan

- Abdul Rahman, M. Z. (2015). Aplikasi Maqasid al-Syari'ah Dalam pentadbiran Negara: Satu Tinjauan sejarah islam. *Jurnal Fiqh*, 12(1), 29–56.
- Al-Mawardi. (2017). *Al Ahkam As Sultaniyyah* [The Ordinances of Government]. Repro Knowledgecast Limited.
- Meerangani, K. A., Harun, M. S., & Badhrulhisham, A. (2021). Kepimpinan Non Muslim di Malaysia Menurut Perspektif Maqāsid Al-Sharī'ah: Non-Muslim Leadership in Malaysia from Maqāsid al-Sharī 'ah Perspectives. *Jurnal Fiqh*, 18(2), 287-314.
- Maszlee Malik & Hamidah Mat (2023). *Siasah Madani*. Kawandanet Sdn Bhd. Cyberjaya.
- Nor, A. H. M., & Laluddin, H. (2012). Application of the principles of maqasid shari 'ah in administration of the Islamic countries. *Advances in Natural and Applied Sciences*, 6(6), 847-851.

## Temu bual

- Dr Sharifah Hayaati. Profesor Jabatan Siasah Syar'iyah, Akademi Pengajian Islam, Universiti Malaya. Temu bual pada 24 April 2024.
- Dr Rosfazila Abd Rahman. Pensyarah kanan Jabatan Pengajian Ketamadunan dan Pembangunan Insan, Fakulti Sains Sosial (FSS) Universiti Islam Selangor (UIS). Temu bual pada 27 Mei 2024.